

編號 1 號

【線上學習】李秉璋原作

神奇、神奇、真神奇，上課毋使鬥緊，交通毋會塞，想愛學麼个，就學麼个。先生在厝擇，時間在厝選，三更半夜乜做得，先生講到生趣又分明。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使納學費，你想愛學，佢就會教。

毋管你係即靈抑係惹霸，佢都收。佢無擇學生仔、無擇時間、無擇所在，單單擇你，擇你想愛學个心。這係學習个革命，這係時代个轉變。來了急、來了遽，跔得著大進步，就像係脣頭有仙人指點，武功大進。

馬桶毋曉整有人教，鏈鋸毋曉使，一步一步來，倒訣¹分你知。網路線个接頭線路毋曉排，有人教你色地愛分明，五花十色照順序，工具合特別，頭尾一下同佢夾落去，接頭插落網路通。

雖然講一個銀角仔毋會響，毋過先生大部分都係自家在該唱戲，講到口涎波潑，精神飽滿，歡頭喜面，若人个都毋會癢又合有耐心！一遍教毋會，過教一遍，你想愛學幾多擺就學幾多擺，

學到你自家無愛。

千里緣分一線牽，天下盡在厝彈指間。現代生活真鬆爽，冷氣吹，彈指間，毋使出門、毋使尖車，想愛仰仔學就仰仔學。就算係疫情時節，學校个線上教學，有一息仔無恁自由，毋過乜有人當認真，煞猛聽課，煞猛查資料，正經係一踢三通，師傅渡入門，修行在個人。上課講義自家留，毋使抄，三個快速鍵一撇，滑鼠一箍，講義就留下來。

上課當日先生有錄影：驚你單單係「用手機仔上課定定」，人毋知走哪位去。故所，先生上課會問問題，一半問，一半係在該點名，看你心思有在無？認真上課个，回答無問題、講頭就知尾，無用心个乜無問題，平平無問題，這個係毋知半項，故所「無問題」。連先生喊佢回答，佢乜像係人間消失，無鏡頭、也無應聲，訊息欄項乜無留字，故所佢正經係「用手機仔上課定定」。

線上學習，成就隨在人，逐儕有擇个自由，就愛對自家个人生負責。對自家未來正經个慷慨，就係同一切都貢獻分現時。今晡日个厝，成就天光日个厝。

¹ 倒訣：音 do` gied`；傾囊相授。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹個後背跣起來，輝煌又晟目个金線就射入天頂。佢箭等該臺一騎就響歸路个老鐵馬，來到吾个百果園，還話講佢今晡日日頭一出來就到地，算當早咧！無胚著，正踏入園肚，隔壁種大梨个阿權哥就在該大聲喊咧：「噯！日頭恁高咧正到哦，敢做有事？」

唉！佢都恁早咧，還輸佢，這阿權哥係歸暗晡毋使睡係無？仰會七早八早就來到？心肝還想等，嘴項又毋肯認輸，順嘴就應佢：「無啦！毋係來做事，來看鷓鴣得地啦！」

吾个山園在山龍園等个窩壠肚，若係堵著像今晡日恁樣个好天時，打早就會有三、四隻大鷓鴣，在四圍个山嶺頂飛啊飛欸。

同阿權哥个嘴鼓都還言搭煞，聽著遠遠个所在傳來「咻！咻！」个聲，鷓鴣出來地！阿權哥看著鷓鴣出來，做等个山事也無心做咧，跔等一陣來搵接梨仔个工人，坐在吾工寮个蔭影²下欣賞這齣大自然个表演。

看佢兜閉開長長个翼胛、跔等氣流，慢慢仔迂、定定仔盤，

¹ 鷓鴣背：音 ieu poˋ zuiˋ；東勢東方山峰名，華語稱鷓鴣山。

² 蔭影：音 im iangˋ；陰影。

越迂越高、緊盤緊遠，到尾變做天邊个一粒烏點，就像係優雅个天頂王者，對天頂看等佢守護个土地。

成半下，還會看著佢兜胸挺挺、目盯盯仔停在胛項个樹極頂高，好恬恬無聲無說就從往下³，一瞬目又轉身飛往上，該尖尖利利个爪項，既經夾等一尾挨著神頭个蛇哥，就一路「咻！咻！咻！」風神个飛入塞塞个樹林裡肚地。

又成時，看佢兜在高高个天頂盤來飛去，忽然間，厥兩片翼胛一收，對天頂直直蹕⁴往下，吾心肝肚還想等：「這隻鷓鴣，這下穩死無命哩！」毋過，看佢硬硬都會撞著地泥地，厥翼胛一闊、利爪一伸，一瞬目時間，該利爪項，毋知哪時又抓著一隻圓身還在該扭啊扭个大老鼠地。佢一轉身，又飛到半天高咧！

歸陣人看鷓鴣表演看到嘴擘擘仔，有人講：「難怪，在這搭山園做恁久事頭，難得看著蛇哥，就係有這兜鷓鴣守護這搭土地，戴在這四角圍个老嫩大細正有好安生生活啊！」

³ 從往下：音 jiungˋ gongˋ haˋ；往下俯衝。

⁴ 蹕：音 zud；觸擊、衝撞。

編號 5 號

【分牛籬蜂¹叨著】李政墩原作

佢分牛籬蜂叨著哩！

寮日朝晨，去山肚巡田水、做田事，無看著路脣个竹園項有大蜂竇，又無細義去撞著該支竹仔，佢兜就走來尋佢輸贏。惡豺豺仔个蜂仔黏時就飛在吾四圍挨挨轉，對等吾圓身黏一路來。佢搵忒一隻看知係牛籬蜂就驚到煞煞走，一片退、一片搵圓身同頭那毛頂頂个蜂仔。退到無蜂仔个所在，正感覺著頭那昂昂、人怪怪，遽遽行轉屋下寮一下來。

無幾久吾頭那殼、圓身、手髀同脅下開始腫起來會痛：頭那殼感覺就像雲飄在天頂，又分人綯等：浮浮、胖胖膨膨合纏纏，試著頭那昂昂、無法度思考。左手巴掌腫到像紅板樣仔，手痺痺、手指尾會伸毋會鉤；坐毋核、睡毋得，唉唉唧唧正經艱苦。若係有陰間，該時个佢應該係戴在裡肚。

落尾分人送去病院掛急診，講有十過隻个蜂仔叨著佢了後，醫生當認真對佢講：一般來講，分牛籬蜂叨有二十針以上就可能有生命危險，這種个蜂仔無解毒个血清、忒傷重有時節會引起過

敏性休克抑係溶血个症頭，盡好愛先通知若屋下人。醫生安排吊大筴射²、注射同抽血，吩咐佢先在醫院歇一暗晡，若係有麼个毋鬆爽愛黏時講。

等佢略略仔眠一下，感覺好當多就想愛轉。毋過醫生愛佢歇加一下正看啊，盡好愛等局出來个尿色有正常，若係變做深深个泥色就較麻煩愛送去大醫院。愛過等，等無麼个问题正做得出院。包尾，都無問題咧，醫生還係吩咐講：「開个藥仔，愛照三餐食；係有哪位毋鬆爽，就愛趕緊過來哦！」

轉屋下換衫褲正知，佢總共分蜂仔叨著十六針，兩隻手髀發炎、腫腫，有罅癢个。左手巴掌還係紅腫無感覺、頭那暈暈想愛睡。睡到半夜緊爪，癢到人硬硬想愛同皮掀起來，想愛爪到骨頭去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食地，該暗晡，真神奇就好睡、毋會癢。

這下，分蜂仔叨个所在既經結痂地，看等這兜爛疤仔又加一擺分佢恹起：該時節、該兜蜂仔，佢一儕人在山肚，有幾危險地！

¹ 牛籬蜂：音 ngiu^ˋ lo^ˋ pung^ˋ；虎頭蜂。也說「油籬蜂」。

² 吊大筴射：音 diau tai gong^ˋ sa；吊點滴。